

四庫全書

子部

欽定四庫全書

子部

日知錄卷三十一

詳校官中書臣賈鏊

員外郎臣牛稔文覆勘

覆校官中書臣田尹衡

校對官中書臣袁文邵

謄錄監生臣李傳燮

欽定四庫全書

日知錄卷三十一

崑山 顧炎武 撰

河東山西

河東山西一地也唐之京師在關中而其東則河故謂之河東元之京師在劍門而其西則山故謂之山西各自其畿甸之所近而言之也

古之所謂山西即今關中史記太史公自序蕭何填撫山西方言自山而東五國之郊郭璞解曰六國惟秦在

山西王伯厚地理通釋曰秦漢之間稱山北山南山東山西者皆指太行以其在天下之中故指此山以表地勢正義以為華山之西非也

陝西

後漢郡國志陝縣有陝陌

即今之陝州

二伯所分故有陝東

陝西之稱水經注河水又東得七里澗澗在陝西七里宋書柳元景傳龐季明率軍向陝西七里谷北史魏孝武帝紀高昂率勁騎及帝於陝西舊唐書太宗紀貞觀

十一年九月丁亥河溢壞陝西河北縣

今平陸縣

肅宗紀乾

元三年四月庚申以右羽林大將軍郭英乂為陝州刺

史陝西節度潼關防禦等使肅宗諸子傳杞王倓可充

陝西節度大使李渤傳澤潞節度使郝士美卒渤充弔

祭使路次陝西

按其疏云已至閭鄉縣

回紇傳廣平王副元帥郭

子儀領回紇兵馬與賊戰於陝西皆謂今陝州之西後

人遂以潼關以西通謂之陝西

晉時以關中為陝西晉書宣帝紀西屯長安天子命之

曰昔周公旦輔成王有素雉之貢今君受陝西之任有
白鹿之獻張實傳愍帝末拜都督陝西諸軍事張華祖
道梁王彤應詔詩二跡陝西實在我王是也東晉則以
荊州為陝西南齊書曰江左大鎮莫過荆揚周世二伯
總諸侯周公主陝東召公主陝西故稱荊州為陝西也
宋書荊州刺史下云王敦治武昌陶侃前治沔陽後治
武昌王廙治江陵庾亮治武昌庾翼進襄陽後還夏口
桓溫治江陵桓沖治上明王說還江陵此考之於史桓
後遂治江陵而晉孝武於襄陽僑立雍州
沖為荊州刺史安帝詔曰故太尉沖昔藩陝西忠誠王

室毛穆之傳庾翼專威陝西劉毅為荊州刺史安帝詔
曰劉毅推轂陝西南史宋文帝紀命王華知州府留鎮
陝西宋書蔡興宗為輔國將軍南郡太守行荊州事袁
顗曰舅今出居陝西鄧琬傳晉安王子勛檄曰前將軍
荊州刺史臨海王子頊練甲陝西獻徒萬數是也

亦有稱陝東者晉書載紀劉聰署石勒大都督陝東諸
軍事又加崇為陝東伯

慕容暉載記秦揚
兵講武運粟陝東唐太宗為秦

王時拜使持節陝東道大行臺

山東河內

古所謂山東者華山以東管子言楚者山東之強國也

史記引賈生言秦并兼諸侯山東三十餘郡後漢陳元

傳言陛下不當都山東

謂光武都雒陽

蓋自函谷關以東總謂

之山東

唐人則以太行山之東為山東杜牧謂山東之地禹畫九土曰冀州是也

而非若今

之但以齊魯為山東也古所謂河內者在冀州三面距

河之內史記正義曰古帝王之都多在河東河北故呼

河北為河內河南為河外又云河從龍門南至華陰東

至衛州東北入海曲繞冀州故言河內蓋自大河以北
總謂之河內而非若今之但以懷州為河內也

吳會

宋施宿會稽志曰按三國志吳郡會稽為吳會二郡張
紘謂收兵吳會則荆揚可一孫賁傳云策已平吳會二
郡朱桓傳云使部伍吳會二郡全琮傳云分丹陽吳會
三郡險地為東安郡是也前輩讀為都會之會殆未是
錢康功曰今平江府署之南名吳會坊漢書吳王濞傳

上患吳會輕悍按今本史記漢書竝作上患吳會稽不

知順帝時始分二郡

順帝紀永建四年分會稽為吳郡

漢初安得言吳

會稽當是錢所見本未誤後人妄增之

本傳吳有章郡銅山亦為後人

於章上妄增一豫字正與此同

魏文帝詩吹我東南行行行至吳會陳

思王求自試表曰撫劔東顧而心已馳於吳會矣晉文

王與孫皓書曰惠矜吳會施及中土魏元帝加晉文王

九錫文曰埽平區宇信威吳會阮籍為鄭沖勸晉王箋

曰朝服濟江埽除吳會陳壽上諸葛亮集曰身使孫權

求援吳會羊祜上疏曰西平巴蜀南和吳會苟勗食舉
樂東西廂歌曰既禽庸蜀吳會是賓左思魏都賦曰覽
麥秀與黍離可作謠於吳會武帝問劉毅曰吾平吳會
一同天下石崇奏惠帝曰吳會僭逆幾於百年石勒表
王浚曰晉祚淪夷遠播吳會慕容廆謂高瞻曰剪鯨豕
於二京迎天子于吳會丁琪諫張祚曰先公累執忠節
遠宗吳會此不得以為會稽之會也蓋漢初元有此名
如曰吳都云爾

胡三省通鑑辨誤太史公謂吳為江南一都會故後人謂吳為吳會

若孫

賁朱桓傳則後人之文偶合此二字不可以證吳王淞傳也

江西廣東廣西

江西之名殆不可曉全司之地並在江南不得言西考

之六朝以前其稱江西者並在秦郡

今六合

歷陽

今和州

廬

江

今廬州府

之境蓋大江自歷陽斜北下京口故有東西之

名

胡三省通鑑註大江東北流故自歷陽至濡須口皆謂之江西而建業謂之江東

史記項羽

本紀江西皆反楊子法言楚分江西三國志魏武帝紀

進軍屯江西郝谿吳主傳民轉相驚自廬江九江今壽州

蕲春廣陵戶十餘萬皆東渡江江西遂虛合肥以南惟

有皖城孫瑜傳賓客諸將多江西人晉書武帝紀安東

將軍王渾出江西穆帝紀江西乞活郭敞等執陳留內

史劉仕而叛時分北譙置陳留郡郝鑒傳拜安西將軍兖州刺史

都督揚州江西諸軍事鎮合肥桓伊傳進督豫州之十

二郡揚州之江西五郡軍事今之所謂江北昔之所謂

江西也故晉地理志以廬江九江自合肥以北至壽春

皆謂之江西

南齊書州郡志左僕射王儉啟江西連接汝潁

今人以江饒洪吉

諸州為江西是因唐貞觀十年分天下為十道其八曰

江南道開元二十一年又分天下為十五道而江南為

東西二道江南東道理蘇州江南西道理洪州後人省

文但稱江東江西爾

始見於舊唐書李峴傳乾元初兼御史大夫持節都統淮南江東江

西節度宣慰觀察處置等使德宗紀建中三年十月辛亥以嗣曹王皋為洪州刺史江西節度使劉禹錫和

吳方之詩今歲雖中無雨雪眼前風今之作文者乃曰

大江以西謬矣

今之廣東廣西亦廣南東路廣南西路之省文也文獻
通考太宗至道三年分天下為十五路其後又增三路
其十七曰廣南東路其十八曰廣南西路

四川

唐時劍南一道止分東西兩川而已至宋則為益州路

後改為成梓州路後改為潼川府利州路今保寧府夔

都府路

路即今潼川州

廣元縣

州路謂之川峽四路後遂省文名為四川

史記菑川國薛縣之誤

漢魯國有薛縣史記公孫弘傳齊菑川國薛縣人也言齊又言菑川而薛並不屬二國殊不可曉正義曰表云菑川國文帝分齊置都劇拈地志云故劇城在青州壽光縣南三十一里故薛城在徐州滕縣界地理志薛縣屬魯國按薛與劇隔兗州及泰山未詳今考儒林傳言薛人公孫弘是弘審為薛人上言齊菑川者誤耳

後漢郡國志薛本國註引地道記曰夏車正奚仲所封冢在城南二十里山上皇覽曰靖郭君冢在魯國薛城

中東南陬孟嘗君冢在城中向門東向門出北邊門也
詩云居常與許鄭玄曰常或作嘗在薛之旁為孟嘗君
食邑史記越世家願齊之試兵南陽莒地以聚常郊之
境索隱曰常邑名蓋田文所封者魏書地形志薛縣彭
城郡有奚公山奚仲廟孟嘗君冢水經注今薛縣故城
側猶有文冢結石為郭作制嚴固瑩麗可尋而史記孟
嘗君傳正義曰薛故城在徐州滕縣南四十四里今淄
川縣志据公孫弘傳之誤文而以為孟嘗君封邑失之

矣路史云公孫弘生山今淄川南四十里亦誤

又按地理志菑川國三縣劇

東安平樓鄉劇在今壽光縣西南東安平在今臨淄縣東南一十里樓鄉未詳所在又高五王傳武帝為悼惠王冢園在齊迺割臨菑東國悼惠王冢園邑盡以予菑川足明菑川在臨菑之東矣今之淄川不但非薛并非漢之菑川乃般陽縣耳以為漢之菑川而又以為孟嘗君之薛此誤而又誤也

曾子南武城人

史記仲尼弟子傳曾參南武城人澹臺滅明武城人同
一武城而曾子獨加南字南武城故城在今費縣西南
八十里石門山下正義曰地理志定襄有武城清河有
武城故此云南武城春秋襄公十九年城武城左氏註
云泰山南武城縣然漢書泰山郡無南武城而有南成
縣屬東海郡後漢書作南城屬泰山郡至晉始為南武
城此後人之所以疑也宋程大昌澹臺祠友教堂記曰
武城有四左馮翊泰山清河定襄皆以名縣而清河特

曰東武城者

史記平原君傳封于東武城

以其與定襄皆隸趙且定

襄在西故也若子游之所宰其實魯邑而東武城者魯

之北也故漢儒又加南以別之史遷之傳曾參曰南武

城人者叔加也子羽傳次曾子省文但曰武城而水經

注引京相璠曰今泰山南武城縣有澹臺子羽冢縣人

也可以見武城之即為南武城也孟子言曾子居武城

有越寇或曰寇至盍去諸曰無寓人於我室毀傷其薪

木新序則云魯人攻鄆

即費字

曾子辭于鄆君曰請出寇

罷而後復來毋使狗豕入吾舍

仁山金氏言曾子書戰有此事作魯人攻費戰

國策甘茂亦言曾子處費則曾子所居之武城費邑也

哀公八年傳吳伐我子洩率故道險從武城又曰吳師

克東陽而進舍于五梧後漢志云南城有東陽城引此

為證

今費縣西南七十里關陽鎮

又可以見南城之即為武城也南

城之名見於史記齊威王曰吾臣有檀子者使守南城

則楚人不敢為寇東取泗上十二諸侯皆來朝漢書但

作南成孝武封城陽其王子貞為南城侯而後漢王符

潛夫論云鄙畢之山南城之冢章懷太子註南城曾子

父所葬在今沂州費縣西南此又南成之即南城而在

費之證也

晉書南武城縣屬秦山郡費縣屬琅邪郡

成化中或言嘉祥之南

武山有曾子墓有漁者陷入其穴得石碣而封志之

疑周

世未有石碣科斗古文亦非今人所識

嘉靖十二年吏部侍郎顧鼎臣奏

求曾氏後得裔孫質粹於吉安之永豐遷居嘉祥十八

年授翰林院五經博士世襲夫曹縣之冉垆為秦相穰

侯魏冉之冢

史記穰侯卒于陶因葬焉水經注濟水又東逕秦相魏冉冢南

而近人之

撰志者以為仲弓如此之類蓋難以盡信也

漢書二燕王傳

漢書燕王定國傳殺肥如令郢人按地理志肥如自屬
遼西郡不屬燕武帝本紀元朔元年秋匈奴入遼西殺
太守諸侯王表言武帝下推恩之令而藩國自析長沙
燕代雖有舊名皆亡南北邊矣然則肥如令之殺於燕
必在元朔以前未析邊郡之時也燕王旦傳發民會圍
大獵文安縣以講士馬其上云武帝時旦坐臧匿亡命

削良鄉安次文安三縣是文安已削不屬燕又云昭帝
立大將軍霍光秉政褒賜燕王錢三十萬益封萬三千
戶昭帝本紀亦云始元元年益封燕王廣陵王及鄂邑
長公主各萬三千戶然則文安縣之仍屬於燕必在益
封萬三千戶之後也此皆史文之互見者可以參考而
得之也

徐樂傳

漢書徐樂燕郡無終人也地理志無燕郡而無終屬右

北平考燕王定國以元朔二年秋有罪自殺國除而元狩六年夏四月始立皇子旦為燕王而其間為燕郡者十年而志軼之也徐樂上書當在此時而無終以其時屬燕後改屬右北平耳

水經注大梁靈丘之誤

左傳桓九年梁伯伐曲沃註梁國在馮翊夏陽縣郤芮曰梁近秦而幸焉是也漢書地理志云馮翊夏陽縣故少梁也水經注乃曰大梁周梁伯之居也梁伯好土功

大具城號曰新里民疲而潰秦遂取焉後魏惠王自安

邑徙都之竹書紀年梁惠成王六年四月甲寅徙都於

大梁是也是誤以少梁為大梁而不知大梁不近秦也

後漢

志河南尹梁故國伯翳後註引博物記曰梁伯好土功今梁多有城亦誤

漢書代郡靈丘應劭

曰趙武靈王葬其東南二十里故縣氏之水經注曰史記

趙敬侯二年敗齊于靈丘則名不因靈王也按史記田敬

仲完世家齊威王元年三晉因齊喪來伐我靈丘

六國表及趙魏

韓世家並同

趙世家惠文王十四年相國樂毅將趙秦韓魏燕

攻齊取靈丘十五年趙與韓魏燕共擊齊湣王敗走燕獨

深入取臨菑而孟子謂蚺鼃曰子之辭靈丘而請士師此

別一靈丘必在齊境後入於趙

胡三省以為即漢清河郡之靈縣今之高唐夏

津皆其故地于欽齊來則云今滕縣東三十里明水河之南有靈丘故城未知何據趙岐孟子註但云靈丘齊

下邑

而孝成王以靈丘封楚相春申君益明其不在代郡

矣水經注云云是誤以趙之靈丘為齊之靈丘而不知

齊境不得至代也

孟子正義引地理志代郡有靈丘縣史記正義曰靈丘蔚州縣竝誤

三輔黃圖

漢西京宮殿甚多讀史殊不易曉三輔黃圖敘次頗悉以長樂未央建章北宮甘泉宮為綱而以其中宮室臺殿為目甚得體要但其無所附麗者悉入北宮及甘泉

宮下則舛矣

雍錄駁此書思子宮萬歲宮隸甘泉之誤而謂元書已亡此出唐人所作誠然今

當以明光宮太子宫二宮別為一條為長安城內諸宮永信宮中安宮養德宮別為一條為長安宮異名長門宮鉤弋宮儲元宮宣曲宮別為一條為長安城外離宮昭臺宮犬臺宮扶荔宮蒲萄宮別為一條為上林苑內

離宮宜春宮五柞宮集靈宮鼎湖宮

湖當作胡見漢書楊雄傳思子

宮黃山宮池陽宮步壽宮萬歲宮梁山宮回中宮首山

宮別為一條為各郡縣離宮

程大昌曰思子宮在湖萬歲宮在汾陰今皆以隸甘

泉與史不合

別有明光宮不知其地附列於後而梁山宮當

并入秦梁山宮下則區分各當矣

前明一統志

永樂中命儒臣纂天下輿地書至天順五年乃成賜名曰大明一統志御製序文而前代相傳如括地志太平

寰宇記之書皆廢今考其書舛謬特甚略摘數事以資後人之改定云

一統志三河本漢臨洶縣地今考兩漢書並無臨洶縣唐書地理志幽州范陽郡潞縣下云武德二年置臨洶縣貞觀元年省臨洶而薊州漁陽郡三河下云開元四年析路縣置故知本是一地先分為臨洶後分為三河皆自唐非漢也

一統志引古事舛戾最多未有若密雲山之可笑者晉

書石季龍載記段遼棄令支奔密雲山遣使詐降季龍
使征東將軍麻秋迎之遼又遣使降于慕容皝曰彼貪
而無謀吾今請降求迎彼不疑也若伏重兵要之可以
得志皝遣子恪伏兵於密雲麻秋統兵三萬迎遼為恪
所襲死者什六七秋步遁而歸是段遼與燕合謀而敗
趙之衆也今一統志云密雲山在密雲縣南一十五里
亦名橫山昔燕趙伏兵於此大獲遼衆是反以為趙與
燕謀而敗遼之衆又不言段而曰遼似以遼為國名豈

修志諸臣并晉書而未之見乎

一統志楊令公祠在密雲縣古北口祀宋楊業按宋史楊業傳業本太原降將太宗以業老於邊事遷代州兼

三交

今陽曲縣

駐泊兵馬都部署會契丹入鴈門業領麾下

數千騎自西京而出由小陁至鴈門北口南嚮背擊之契丹大敗以功遷雲州觀察使雍熙三年大兵北征以忠武軍節度使潘美為雲應路行營都部署命業副之以西上閣門使蔚州刺史王侁軍器庫使順州團練使

劉文裕護其軍諸軍連拔雲應寰朔四州師次桑乾河
會曹彬之師不利諸路班師美等歸代州未幾詔遷四
州之民於內地令美等以所部兵護之時契丹復陷寰
州侁令業趨鴈門北川業以為必敗不可侁偏之行業
指陳家谷口曰諸君於此張步兵強弩為左右翼以援
美即與侁領麾下兵陳於谷口自寅至巳侁使人登托
邏臺望之以為契丹敗走欲爭其功即領兵離谷口美
不能制乃緣交河西南行二十里俄聞業敗即麾兵却

走業力戰至谷口望見無人即拊膺大慟再率帳下士力戰身被數十創士卒殆盡業猶手刃數十人馬重傷不能進為契丹所擒不食三日死是業生平未嘗至燕况古北口又在燕東北二百餘里地屬契丹久矣業安得而至此且史明言鴈門之北口而以為密雲之古北口是作志者東西尚不辨何論史傳哉又按遼史聖宗紀統和四年七月丙子樞密使斜軫奏復朔州擒宋將楊繼業耶律斜軫傳繼業敗走至狼牙村衆軍皆潰繼

業為飛矢所中被擒與宋史略同密雲縣志威靈廟在
古北口北門外一里祀宋贈太尉大同軍節度使楊公
成化十八年禮部尚書周洪範記引宋史全文而不辨
鴈門北口之非其地豐潤縣志令公村在縣西十五里
宋楊業屯兵拒遼於此有功故名並承一統志而誤
一統志遼章宗陵在三河縣北五十五里考遼無章宗
其一代諸帝亦無葬三河者

一統志金太祖陵世祖陵俱在房山縣西二十里三峰

山下宣宗陵章宗陵俱在房山縣西大房山東北按金
史海陵紀貞元三年三月乙卯命以大房山雲峰寺為
山陵建行宮其麓五月乙卯命判大宗正事京等如上
京奉遷太祖太宗梓宮十一月乙巳朔梓宮發丕承殿
戊申山陵禮成正隆元年七月己酉命太保昂如上京
奉遷始祖以下梓宮八月丁丑如大房山行視山陵十
月乙酉葬始祖以下十帝於大房山閏月己亥朔山陵
禮成又太祖紀太祖葬睿陵太宗紀太宗葬恭陵世宗

紀世宗葬興陵章宗紀章宗葬道陵又熙宗紀帝被弑葬於皇后裴滿氏墓中貞元三年改葬於大房山蓼香甸諸王同兆域大定初追上謚號陵曰思陵二十八年改葬於峨嵋谷仍號思陵又海陵紀葬於大房山鹿門谷後降為庶人改葬於山陵西南四十里又睿宗紀大定二年改葬於大房山號景陵顯宗紀大定二十五年十二月庚寅葬於大房山章宗即位號曰裕陵是則金代之陵自上京而遷者十二帝其陵曰光曰熙曰建曰

輝曰安曰定曰永曰泰曰獻曰喬曰睿曰恭其崩於中都而葬者二帝其陵曰興曰道被弑者一帝其陵曰思追謚者二帝其陵曰景曰裕被弑而降為庶人者一帝葬在兆域之外而宣帝則自即位之二年遷於南京三年五月中都為蒙古所陷葬在大梁非房山矣今一統志止有四陵而誤列宣宗又躋於章宗之上諸臣不學之甚也

漢書地理志樂浪郡之縣二十五其一曰朝鮮應劭曰

故朝鮮國武王封箕子於此志曰殷道衰箕子去之朝鮮山海經曰朝鮮在列陽東海北山南註朝鮮今樂浪縣箕子所封也在今高麗國境內慕容氏於營州之境立朝鮮縣魏又於平州之境立朝鮮縣但取其名與漢縣相去則千有餘里一統志乃曰朝鮮城在永平府境內箕子受封之地則是箕子封於今之永平矣當日儒臣令稍知今古者為之何至於此為之太息

一統志登州府名宦下云劉興居高祖孫齊悼惠王肥

子誅諸呂有功封東牟侯惠澤及於邦人至今廟祀不絕考史記漢書本紀年表興居以高后六年四月丁酉封孝文帝二年冬十月始令列侯就國春二月乙卯立東牟侯興居為濟北王其明年秋以反誅是興居之侯於東牟僅三年其奉就國之令至立為濟北王相距僅五月其曾到國與否不可知安得有惠澤及人之事歷二十年而思之不絕者乎甚矣修志者之妄也

王文公虔州學記虔州江南地最曠大山長谷荒翳險

阻以曠字絕為一句谷字絕為一句阻字絕為一句文
理甚明今一統志贛州府形勝條下摘其二語曰地最
曠大山長谷荒句讀之不通而欲從事於九丘之書真
可為千載笑端矣

交趾

大學衍義補曰交趾本秦漢以來中國郡縣之地

秦為象郡

地漢武帝平南越置交趾九真日南三郡

五代時為劉隱所并至宋初始封

為郡王然猶授中國官爵勲階如所謂特進檢校太尉

靜海軍節度觀察等使及賜號推誠順化功臣皆如內地之臣未始以國稱也其後封南平王奏章文移猶稱安南道孝宗時始封以王稱國而天下因以高麗真臘視之不復知其為中國之郡縣矣李氏傳八世陳氏傳十二世至日焜為黎季聲所篡季聲上表竄姓名為胡一元子蒼易名奩詐稱陳氏絕嗣奩為甥求權署國事太宗皇帝從其請逾年陳氏孫名添平者始遁至京愬其實季聲乃表請迎添平還國朝廷不逆其詐遣使送

添平歸抵其境季聲伏兵殺之并及使者事聞太宗徧告於天地神祇聲罪致討遣征夷將軍朱能等征之能道卒命副將張輔總其兵生禽季聲及其子蒼澄獻俘京師詔求陳氏遺裔立之國人咸稱季聲殺之盡無可繼者僉請復古郡縣遂如今制立交趾都布按三司及各府州縣衛所諸司一如內地其後有黎利者乃彼中么麼小醜耳中官庇之遂致猖肆上表請立陳氏後宣宗皇帝謂此皇祖意也遂聽之即棄其地俾復為國鳴

呼自秦并百粵交趾之地已與南海桂林同入中國漢
武立嶺南九郡而九真日南交趾與焉在唐中葉江南
之人仕中國顯者猶少而愛州人姜公輔唐書姜公輔
愛州日南人
已仕中朝為學士宰相與中州之士相頡頏矣奈何世
歷五代為土豪所據宋興不能討之遂使茲地淪於蠻
裔之域而為侏僂藍縷之俗三百餘年而不得與南海
桂林等六郡同為衣冠禮樂之區一何不幸哉按交趾
自漢至唐為中國之地在宋為化外州雖貢賦版籍不

上戶部然聲教所及皆邊州帥府領之永樂間平定其

地設交趾都指揮使司布政使司按察司各一衛十千

戶所二府十三

六年十月自州陞為府者二

州四十一縣二百八市

舶提舉司一巡檢司百稅課司局等衙門九十二而升

遐之後上尊謚議以復交趾郡縣於數千載之後驅元

人餘黨於數萬里之外為言既述武功之成亦侈輿圖

之廣後以兵力不及而棄之乃天順中修一統志竟以

安南與占城暹羅等國同為一卷

天順八年七月實錄寧遠州本中國地國

初屬雲南布政司宣德初黎利叛朝廷予之故地乃并寧遠州及廣西太平府之祿州為所占當時有司失於檢察今遂

嗟乎巴濮楚鄧吾南土也徂域中之見而忘陷於夷無外之規吾不能無議夫儒臣者

清類天文分野之書乃洪武十七年閏十月進其中如上都大寧遼東諸郡縣竝載前代沿革而云本朝未立內地如河間府之莫州莫亭會川樂壽亦具前代沿革而云本朝未立不以一時郡縣之有無而去歷代相因之版籍甚為有體

薊

漢書薊故燕國召公所封後漢書薊本燕國刺史治自
七國時燕都於此項羽立臧荼為燕王都薊高帝因之
為燕國元鳳元年燕刺王旦自殺國除為廣陽郡本始
元年為廣陽國建武十三年省屬上谷永平八年一作永元
年復為廣陽郡晉復為燕國魏為燕郡隋開皇初廢大
業初置涿郡唐天寶元年更名范陽郡並治薊水經濕
水過廣陽薊縣北又東至漁陽雍奴縣註今城內西北

隅有薊丘因丘以名邑也後漢書彭寵傳寵反漁陽自將二萬餘人攻朱浮於薊晉書載記魏圍燕中山清河王會自龍城遣兵赴救建威將軍餘崇為前鋒至漁陽遇魏千餘騎鼓譟直進殺十餘人魏騎潰去崇亦引還會乃上道徐進始達薊城即此三事可見薊在漁陽之西唐書地理志幽州范陽郡治薊開元十八年析置薊州漁陽郡治漁陽及遼改薊為析津縣因此薊之名遂沒於此而存於彼今人乃以漁陽為薊而忘其本矣史

記樂毅書薊丘之植植於汶篁此即水經注所言薊丘

禮記樂記武王克殷反商未及下車而封皇帝之後於

薊

史記及水經注並云堯後

疏云今涿郡薊縣是也即燕國之都孔

安國司馬遷及鄭皆云燕祖召公與周同姓按黃帝姓

姬召公蓋其後也

穀梁傳曰燕周之分子也皇甫謐因謂召公為文王之庶子而范甯註又

以為成王所封然考左傳富辰之言不叙及燕

按此以薊燕為一國而召公即

黃帝之後史記周本紀武王封帝堯之後於薊封召公

奭於北燕正義曰按周封以五等之爵薊燕二國俱武

王立因燕山薊丘為名其地自立國後薊微燕盛乃并薊居之其說為長

夏謙澤

晉書載記慕容寶盡徙薊中府庫北趨龍城魏石河頭引兵追及之于夏謙澤在薊北二百餘里恐非按水經注鮑邱水東南流逕潞城南又東南入夏澤澤南紆曲渚一十餘里北佩謙澤眇望無垠也下云鮑丘水又東與洵河合三河志鮑邱河在縣西二十五里源自口外

南流經九莊嶺過密雲合道入溪至通州之米莊村合
沽水入洵河今三河縣西三十里地名夏店舊有驛鮑
丘水經其下而洵河自縣城南至寶坻下入於海疑夏
店之名因古夏澤其東彌望皆陂澤與水經注正合自
薊至龍城此其孔道寶以丙辰行魏人以戊午及之相
距二日適當其地也

石門

後漢書公孫瓚傳中平中張純與烏桓丘力居等入寇

瓚追擊戰於屬國石門大敗之註石門山在今營州柳城縣西南而水經注云湟水又東南逕石門峽山高嶄絕壁立洞開俗謂之石門口漢中平五年公孫瓚討張純戰于石門大破之今薊州東北六十里石門驛即水經注之石門是也按史本紀但言石門而傳言屬國石門明有兩石門

北齊書皮慶賓正光中因使懷朔遇世亂遂家廣寧之石門縣水經注

所指乃漁陽之石門非遼東屬國之石門當以柳城為

是通典柳城有石門山

無終

玉田漢無終縣漢書地理志故無終子國溲水西至雍
奴入海史記項羽封韓廣為遼東王都無終後漢書
吳漢將二十騎先馳至無終常昭國語解無終山戎之
國今為縣在北平水經注藍水出北山東屈而南流逕
無終縣故城東故城無終子國也魏氏土地記曰右北
平城西北百三十里有無終城無終之為今玉田無可
疑者然左傳襄公四年無終子使孟樂如晉因魏莊子

納虎豹之皮以請和諸戎昭公元年晉中行穆子敗無
終及羣狄于太原漢書樊噲傳擊陳稀破得綦母卬尹
潘軍於無終廣昌則去玉田千有餘里豈無終之國先
在雲中代郡之境而後遷于右北平與左傳正義曰釋例土地名以北
戎山戎無終三名為一北平有無終縣太原即太原郡
晉陽縣是也計無終在太原東北二十餘里遠就太原
來與晉戰不知其何故也蓋
與諸戎近晉者相率而來也

柳城

史言慕容皝以柳城之北龍山之西福德之地乃營立

宗廟宮闕命曰龍城一統志柳城在永平府西二十里
龍山在府西四十里永平府舊志柳城在昌黎縣西南
六十里漢永為烏桓所據曹操滅之歷魏晉為慕容氏
父子所據隋置縣屬遼西郡唐置營州元省入昌黎為
靜安社其說與史不同今府西二十里全無遺跡而靜
安社則嘉靖三十一年立為堡然皆非柳城之舊也按
唐書營州柳城郡下云城西四百八十里有渝關守捉
城又云西北接奚北接契丹通典營州柳城郡下云東

至遼河四百八十里南至海二百六十里西至北平郡
七百里北至契丹界五十里東南到安東府二百七十
里西南到北平郡七百里西北到契丹界七十里東北
到契丹界九十里而平州北平郡下云東至柳城郡七
百里西至漁陽郡三百里東北到柳城郡七百里是柳
城在今永平之東北七百里而慕容氏之龍城昌黎及
魏以後之營州並在其地唐萬歲通天元年為契丹所
陷聖歷二年僑治漁陽開元五年又還治柳城

舊唐書
宋慶禮

傳初營州都督府置在柳城控帶奚契丹則天時都督趙文翹政理乖方兩蕃反叛攻陷州城其後移於幽州東二百里漁陽城安置開元五年奚契丹各款塞歸附玄宗乃詔慶禮及太子詹事姜師度左驍衛將軍邵宏等充使更於柳城築營州城興而今之昌黎乃金之廣役三旬而畢詔書見冊府元龜

寧縣大定二十九年改為昌黎名同而地異也

三國志魏武帝用田疇之言上徐無山塹山堙谷五百餘里經白檀歷平岡涉鮮卑庭東指柳城徐無山在今玉田則柳城在玉田之東北數百里也北齊書顯祖伐契丹以十月丁酉至平州從西道趨長塹辛丑至白狼

城士寅至昌黎城是昌黎在平州之東北齊主之行急
猶五日而後至也隋書漢王諒伐高麗軍出臨渝關至
柳城唐書太宗伐高麗還以十月丙午次營州詔遼東
戰亡士卒骸骨竝集柳城東南命有司設太牢上自作
文以祭之丙辰皇太子迎謁於臨渝關關在今撫寧之
東則柳城又在其東太宗之行遲故十日而後至也

遼史載柳城曰興中府古孤竹國漢柳城縣地慕容皝
以柳城之北龍城之南福德之地乃築龍城構宮廟改

柳城為龍城縣而遷都之號曰和龍宮慕容垂復居焉

垂都鄴其子寶始遷龍城非垂也

後為馮跋所滅

高雲滅慕容氏馮跋代高雲非跋滅慕容

氏魏取之為遼西郡隋平高寶寧置營州煬帝改柳城

郡唐武德初改營州總管府尋為都督府萬歲通天元

年陷李萬營神龍初徙府幽州開元四年復治柳城八

年徙漁陽十年還柳城

舊唐書奚傳李大輔與契丹首領李失活請於柳城依舊置營

州都督府從之

後為奚所據太祖平奚及俘燕民將建城命韓知

方擇其處乃完葺柳城號霸州彰武軍節度重熙十年

升興中府有太華山小華山香高山麝香崖天授皇帝
刻石在焉駐龍峪神射泉小龍河統州二縣四其一曰
興中縣本漢柳城縣地太祖掠漢民居此置霸城縣重
熙中置府更名此文述柳城之故頗為詳備元世祖至
元七年十月己丑降興中府為州以地圖案之當在今
前屯衛之北但唐書平州下云又有柳城軍永泰元年
置蓋唐時柳城之地屢被陷沒移徙無常此其在平州
者或即今之靜安社未可知

通典鑿無間山在遼東今
於柳城郡東置祠遙禮此

即是移置之柳城

然不可以永泰元年之柳城為古之柳城也

一統志采輯諸書不出一人之手如柳城廢縣既云在府城西二十里矣而以土產則云人參麝香豹尾俱廢柳城縣出今府西二十里乃灤河之西洞山之南沙土地其能出此三物乎按唐書營州柳城郡貢人復麝香豹尾皮骨鼯志本引之而不知所指府西二十里廢柳城縣之誤也

昌黎

按昌黎有五漢書遼西郡之縣其八曰昌黎渝水首受塞外南入海東部都尉治應劭曰今昌黎水經注白狼水又東北逕昌黎縣故城西地理志曰交黎也通鑑註昌黎漢交黎縣屬遼西郡後漢屬遼東屬國都尉魏齊王正始五年鮮卑內附復置遼東屬國立昌黎縣以居之後立昌黎郡晉書武帝紀太康二年慕容廆寇昌黎二年安北將軍嚴詢敗慕容廆於昌黎成帝咸康二年慕容皝自昌黎東踐冰而進凡三百餘里至歷林口是

則在渝水下流而當海口此一昌黎也晉書載記慕容
皝徙昌黎郡又云破宇文歸之衆徙其部人五萬餘落
於昌黎及慕容盛之世有昌黎尹張順劉忠高雲以馮
素弗為昌黎尹馮跋之世有昌黎尹孫伯仁以史考之
當去龍城不遠此又一昌黎也魏併柳城昌黎棘城於
龍城而立昌黎郡志云有堯祠榆頓城狼水而列傳如
韓麒麟韓秀谷渾孫紹之倫皆昌黎人即燕之舊都龍
城北又一昌黎也齊以後昌黎之名廢至唐太宗貞觀

三年更崇州為北黎州治營州之東北廢陽師鎮八年復為崇州置昌黎縣後淪於奚遼史建州永康縣本唐昌黎縣地此又一昌黎也遼太祖以定州俘戶置營州鄰海軍其縣一曰廣寧金世宗大定二十九年改為昌黎相沿以至於今在永平府城東南七十里此又一昌黎也郭造卿永平志辨昌黎有二而不知其有五今序而列之論古者可以無惑焉

韓文公多自稱昌黎唐書載韓氏世系則云漢方高侯

顏當喬孫世居潁川徙安定武安常山九門而生安定

桓王茂為公之六世祖與昌黎之韓支派各別故先儒

以為公之自稱本其郡望宋元豐七年封公為昌黎伯

亦是取其本望

唐宋封爵必取本望元和朔方帥天水閭某者封邑太原乃自言非本郡上

謂宰相李吉甫曰有司之誤不可再也宜使儒生條其源系考其郡望子孫職任竝總輯之每加爵邑則令閱

視乃命林寶撰次元和姓纂十一卷明初亦如之太平忠臣祠追封花雲東邱郡侯許瑗高陽郡侯王鼎太原

郡侯是也如韓長鸞韓建封昌黎王韓擇木封昌黎伯韓偓

封昌黎男之比若昌黎之韓最著於魏如麒麟顯宗史

明言其為昌黎棘城人又非今之昌黎也然則文公之沒二百六十年而始封昌黎伯又一百六年而始立今之昌黎縣以金之縣而合宋之封遂謂文公為此縣之人其亦未之考矣

石城

漢右北平郡之縣十六其三曰石城後漢無之蓋光武所併省也至燕分置石城郡考之通鑑及晉載記得二事慕容寶宿廣都黃榆谷清河王會勒兵攻寶寶帥輕

騎馳二百里晡時至龍城會遣騎追至石城不及是廣都去龍城三百里而石城在其中間也慕容熙敗于北原石城令高和與尚方兵於後作亂註云高和本為石城令時以大喪會於龍城是石城去龍城不遠也魏書地形志廣興下云有鷄鳴山石城大柳城此即漢之石城矣魏太平真君八年置建德郡治白狼城領縣三其一曰石城有白鹿山祠其二曰廣都水經注石城川水出西南石城山東流逕石城縣故城南北屈逕白鹿山

西即白狼山也又東北入廣成縣東廣城即廣都城燕
之石城在廣都之東北而此在廣都之西南是魏之石
城非燕之石城矣隋書始無石城云北齊廢之而唐書
平州石城下云本臨渝武德七年省貞觀十五年復置
萬歲通天二年更名有臨渝關有大海有碣石山是武
后所更名之石城又非魏之石城矣

舊唐書回紇傳追
躡史朝義至平州

石城縣
泉其首

遼史灤州統縣三其三曰石城下云唐貞觀中

於此置臨渝縣萬歲通天元年改石城縣在灤州南三

十里唐儀鳳石刻在焉今縣又在其南五十里遼徙置以就鹽官是遼之石城又非唐之石城矣今之開平中屯衛自永樂三年徙於石城廢縣在灤州西九十里乃遼之石城而一統志以為漢舊縣何其謬與

木刀溝

新樂縣西南三十里有水名木刀溝新唐書地理志新樂下云東南二十里有木刀溝有民木刀居溝旁因名

之予過新樂林君華晚見示所修縣志以木刀為不憲典改為木鐸因取笥中唐志示之林君真然自失

宗紀元和五年四月丁亥河東節度使范希朝義武軍

節度使張茂昭及王承宗戰於木刀溝敗之

范希朝傳同

張

茂昭傳承宗以騎二萬踰木刀溝與王師薄戰茂昭躬

擐甲為前鋒令其子克讓從子克儉與諸軍分左右翼

繞戰大破之沙陀傳王承宗衆數萬伏木刀溝與朱邪

執宜遇飛矢雨集執宜提軍橫貫賊陣鏖鬪李光顏等

乘之斬首萬級而舊書李光進傳范希朝引師救易定

表光進為步都虞候戰於木刀溝有功此溝在鎮定二

節度之界古為戰地

江乘

古時未有瓜洲蔡寬夫詩話潤州大江本與今揚子橋對岸而瓜洲乃江中一洲耳今與揚子橋相連矣以故自古南北之津上則由采石下則由江乘而京口不當往來之道史記秦始皇登會稽還從江乘渡正義云江乘故縣在今潤州句容縣北六十里吳徐盛作疑城自石頭至江乘晉蔡謨自土山至江乘鎮守八所城壘凡

十一處皆以沿江為防守之要今其地在上元縣東北五十里唐肅宗上元元年李岷闢北固為兵場挿木以塞江口劉展軍于白沙設疑兵於瓜洲多張火鼓若將趨北固者如是累日岷悉銳兵守京口以待之展乃自上流濟襲下蜀胡三省通鑑註云此自白沙濟江也昇州東北九十里至句容縣有下蜀戍在句容縣北近江津今江乘去江幾二十里以外皆為洲渚而渡口乃移于龍潭又瓜洲既連揚子橋江面益狹而隋唐之代復

以丹陽郡移治丹徒於是渡者舍江乘而趨京口

舊唐書張

延賞傳邊江之瓜洲舟航湊會而懸屬江南延賞奏請以江為界人甚便之

宋乾道四年築

瓜洲南北城而京口之渡至今因之

瓜洲得名本以瓜步山之尾生此一洲故爾舊唐書齊

澣傳潤州北界隔江至瓜步尾紆滙六十里船繞瓜步

多為風濤漂損澣乃移漕路於京口塘下直渡江二十

里又開伊婁河二十五里即達楊子縣

胡三省通鑑註今之楊子橋或

是唐之楊子縣治所橋以此得名也

自是免漂損之災歲減腳錢數十萬

又立伊婁埭官收其課迄今利濟焉北京口漕路繇爪洲之始玄宗紀載此事則謂之爪洲浦而五行志開元十四年七月潤州大風從東北海濤奔上没爪步洲捐居人永王璘傳李承式使判官評事裴茂以步卒三千拒於爪步洲伊婁埭則此洲本亦謂之爪步洲也

郭璞墓

晉書郭璞傳璞以母憂去職卜葬地于暨陽去水百步許人以近水為言璞曰當即為陸矣其後沙漲去墓數

十里皆為桑田王惲集乃云金山西北大江中亂石間
有叢薄鴉鵲棲集為郭璞墓按史文元謂去水百步許
不在大江之中且當時即已沙漲為田而暨陽在今江
陰縣界不在京口又所葬者璞之母而非璞也世之所
傳皆誤

世說載璞詩曰此阜烈烈巨海混混壘壘三墳惟母與昆則璞又有二兄同葬

螺磯

蕪湖縣西南七里大江中螺磯相傳昭烈孫夫人自沈
於此有廟在焉按水經注武陵孱陵縣故城王莽更名

辱陸也劉備孫夫人權妹也又更修之則是隨昭烈而
至荊州矣蜀志曰先主既定益州而孫夫人還吳又裴
松之注引趙雲列傳曰先主入益州雲領留營司馬時
孫夫人以權妹驕豪多將吳吏兵縱橫不法先主以雲
嚴重必能整齊特任掌內事權聞備西征大遣舟船迎
妹而夫人欲將後主還吳雲與張飛勒兵截江乃得後
主還是孫夫人自荊州復歸于權而後不知所終蠟磯
之傳殆妄

胥門

史記吳王既殺子胥吳人為立祠於江上號曰胥山水
經注引虞氏曰松江北去吳國五十里江側有丞胥二
山山各有廟魯哀公十三年越使二大夫疇無餘謳陽
等伐吳吳人敗之獲二大夫大夫死故立廟於山上號
曰丞胥二王也胥山上今有壇石長老云胥神所治也
一以為子胥一以為越大夫今蘇州城之西南門曰胥
門陸廣微吳地記云本伍子胥宅因名非也趙樞生曰

按吳越春秋吳王夫差十三年將與齊戰道出胥門因過姑胥之臺則子胥未死已名為胥門愚考左傳哀公十一年艾陵之戰胥門巢將上軍胥門氏巢名蓋居此門而以為氏者如東門遂桐門右師之類周禮大司馬古者軍將蓋為營治于國門魯有東門襄仲宋有桐門右師皆上卿為軍將者也則是門之名

又必在夫差以前矣淮南子句踐甲卒三千人以擒夫差於姑胥越絕書吳王起姑胥之臺五年乃成姑胥山名也不可知其所始其字亦為姑蘇國語吳王帥其賢良

與其重祿以上姑蘇史記越伐吳敗之姑蘇伍被對淮

南王言見麋鹿游姑蘇之臺古胥蘇二字多通用

戰國策以

包胥為勃蘇詩山有扶蘇傳曰扶蘇扶胥

潮信

白樂天詩早潮纔落晚潮來一月周流六十回白是北人未諳潮候今杭州之潮每月朔日以子午二時到每日遲三刻有餘至望日則子潮降而為午午潮降而為夜子以後半月復然

西江江岸上有候潮碑

故大月之潮一月五

十八回小月則五十六回無六十回也水月皆陰之屬
月之麗天出東入西大月二十九回小月二十八回亦
無三十回也所以然者陽有餘而陰不足自然之理也

晉國

晉自武公滅翼

今翼城縣

而王命曲沃伯以一軍為晉侯其

時疆土未廣至獻公始大考之於傳滅楊

今洪洞縣

滅霍

今霍

州滅耿

在今河津縣

滅魏

在今蒲州

滅虞

在今平陸縣

重耳居蒲

在今隰州

夷吾居屈

在今吉州

太子居曲沃

在今聞喜縣

而公都絳

在今太平縣

不過今平陽一府之境

國語宰孔謂晉侯景霍以為城而汾河洩澮以為淵是也而

滅虢

在今陝州滅焦

今陝州

則跨大河之南

史記晉世家言獻公時晉疆西有河

西與秦接境北邊翟東至河內索隱曰河內河曲也內音內蓋即今平陸芮城之地

至惠公敗韓

之後秦征河東則內及解梁

在今臨晉縣

狄取狐厨

在今鄉寧縣

涉汾而晉境稍蹙文公始啟南陽得今之懷慶襄公敗

秦于殽自此惠公賂秦之地復為晉有而以河西為境

若霍太山以北大都皆狄地不屬於晉文公作三行以

禦狄襄公敗狄于箕而其患始稀悼公用魏絳和戎之

謀以貨易土

在文公後六十年

平公用荀吳敗狄于太原於是

晉之北境至於洞渦雒陰之間而鄔祁

並今祁縣

平陵梗陽

今清源縣涂水

在今榆次縣

馬首孟

今孟縣

為祁氏之邑晉陽

今太原縣

為趙氏之邑矣若成公滅赤狄潞氏而得今之潞安頃公滅肥滅鼓而得今之真定皆一一可考吾於杜氏之解綿上箕而不能無疑并唐叔之封晉陽亦未敢以為然也

縣上

左傳僖二十四年晉侯賞從亡者介之推不言祿祿亦弗及遂隱而死晉侯求之不獲以縣上為之田杜氏曰西河界休縣南有地名縣上水經注石桐水即縣水出介休縣之綿山北流逕石桐寺西即介子推之祠也袁崧郡國志曰界休縣有介山有縣上聚子推廟今其山南跨靈石東跨沁源世以為之推所隱而漢魏以來傳有焚山之事大原上黨西河鴈門之民至寒食不敢舉火石勒禁之而電起西河介山大如雞子平地三尺前

史載之無異辭也然考之於傳襄公十三年晉悼公蒐于縣上以治兵使士臼將中軍讓于荀偃此必在近國都之地又定公六年趙簡子逆宋樂祁飲之酒于縣上自宋如晉其路豈出於西河界休乎況文公之時霍山以北大抵皆狄地與晉都遠不相及今翼城縣西亦有縣山俗謂之小縣山近曲沃當必是簡子逆樂祁之地襄公二十九年齊高豎致盧而出奔晉晉人城縣而寘旃縣或即縣山今萬泉縣南二里有介山漢書武帝紀詔曰朕用事介山祭后土皆有光

應地理志汾陰介山在南

今萬泉古汾陰地

楊雄傳其三月將

祭后土上迺帥羣臣橫大河湊汾陰既祭行游介山回
安邑顧龍門覽鹽池登歷觀陟西岳以望八荒雄作河
東賦曰靈輿安步周流容與以覽于介山嗟文公而慙
推兮勤大禹於龍門水經注亦引此謂晉太康記及地
道記與永初記並言子推隱於是山而辨之以為非然
可見漢時已有二說矣

箕

左傳僖公三十三年狄伐晉及箕解曰太原陽邑縣南有箕城非也陽邑在今之太谷縣襄公時未為晉有傳言狄伐晉及箕猶之言齊伐我及清也必其近國之地也成公十三年厲公使呂相絕秦曰入我河縣焚我箕解無郃又必其邊河之邑秦狄皆可以爭而文公八年有箕鄭父襄公二十一年有箕遺當亦以邑氏其人者矣

唐

左傳昭公元年遷實沈于大夏定公四年命以唐誥而

封于夏虛服虔曰大夏在汾澮之間杜氏則以為太原
晉陽縣按晉之始見春秋其都在翼括地志故唐城在
絳州翼城縣西二十里堯裔子所封成王滅之而封太
叔也北距晉陽七百餘里即後世遷都亦遠不相及

竹書

紀年康王九年唐遷于晉
宣王十六年晉遷于絳

況霍山以北自悼公以後始

開縣邑而前此不見於傳又史記晉世家曰成王封叔
虞于唐唐在河汾之東方百里翼城正在二水之東而
晉陽在汾水之西又不相合竊疑唐叔之封以至侯緡

之滅並在於翼史記屢言禹鑿龍門通大夏呂氏春秋
言龍門未闢呂梁未鑿河出孟門之上則所謂大夏者
正今晉絳吉隰之間書所云維彼陶唐有此冀方而舜
之命臯陶曰蠻夷猾夏者也當以服氏之說為信又齊
桓公伐晉之師僅及高粱在今臨汾縣而封禪書述桓公之
言以為西伐大夏大夏之在平陽明矣漢書地理志註
臣瓚曰所謂唐
今河東永安是也師古以瓚說為
是按永安乃今之霍州亦非也

晉都

春秋時晉國本都翼在今之翼城縣及昭侯封文侯之

弟桓叔于曲沃桓叔之孫武公滅翼而代為晉侯都曲

沃在今聞喜縣漢志聞喜故曲沃其子獻公城絳居之在今太

平縣之南絳州之北今太平縣南二十五里城址尚存歷惠懷文襄靈

成六公至景公遷于新田在今曲沃縣杜氏曰新田今平陽絳邑縣是

後魏始名曲沃當汾澮二水之間於是命新田為絳而以其故

都之絳為故絳此晉國前後四都之故蹟也

晉自都絳之後遂以曲沃為下國僖公十年狐突適下國然其宗

廟在焉考悼公之立

成公十八年

大夫逆于清原

杜氏曰河東聞喜縣

北有清原是次郊外庚午盟而入辛巳朝于武宮是入曲沃

而朝于廟二月乙酉朔即位于朝是至絳都而平公之

立

襄公十六年

亦云改服修官烝于曲沃但不知其後何以

遂為欒氏之邑而欒盈之入絳范宣子執魏獻子之手

賂之以曲沃

襄公二十三年

夫以宗邑而與之其臣聽其所自

為端氏之封屯留之徙其所由來者漸矣

瑕

晉有二瑕其一左傳成公六年諸大夫皆曰必居郇瑕氏之地杜氏曰郇瑕古國名水經注涑水又西南逕瑕城京相璠曰今河東解縣西南五里有故瑕城是也

杜以

郇瑕為一地
鄰以為二地

在今之臨晉縣境其一僖公三十年燭之

武見秦伯曰許君焦瑕朝濟而夕設版焉解焦瑕晉河外五城之二邑文公十二年晉人秦人戰于河曲秦師夜遁復侵晉入瑕解以河曲為河東蒲坂縣南則瑕必在河外十三年晉侯使詹嘉處瑕以守桃林之塞按漢

書地理志湖故曰胡武帝建元年更名湖水經河水又東逕湖縣故城北酈氏注云晉書地道記太康記並言胡縣漢武帝改作湖其北有林焉名曰桃林古瑕胡二字通用禮記引詩心乎愛矣瑕不謂矣鄭氏註云瑕之言胡也瑕胡音同故記用其字是瑕轉為胡又改為湖而瑕邑即桃林之塞也

書放牛桃林之野
註云在華山東

今為閬鄉縣

治而成公十三年伐秦成肅公卒于瑕亦此地也道元以郇瑕之瑕為詹嘉之邑誤矣

左傳有三瑕而郇瑕不與焉桓公六年軍於瑕

以待之註瑕隨地成公十六年楚師還及瑕註瑕楚地昭公二十四年王子朝之師攻瑕及杏皆潰註瑕杏敬邑王

僖公十五年晉侯賂秦伯以河外列城五東盡虢略南

及華山正義曰自華山之東盡虢之東界其間有五城

也傳稱焦瑕蓋是其二

水經注陝縣故焦國竹書紀年幽王七年虢人滅焦

成公元年晉侯使瑕嘉平戎于王瑕嘉即詹嘉以邑為

氏僖公十五年瑕呂飴甥當亦同此

竹書紀年惠王十九年晉獻公滅虢

命瑕父呂甥邑于虢都傳謂之陰飴甥者陰亦虢地或兼食之也

而解以瑕呂為姓恐

非

九原

禮記檀弓趙文子與叔譽觀於九原水經注以為在京

陵縣漢志太原郡京陵師古曰即九京因記文或作九

京而傳會之爾

文子曰是全要領以從先大夫於九京也方氏曰九京即九原指其冢之高曰

京指其地之廣曰原

古者卿大夫之葬必在國都之北不得遠涉

數百里而葬於今之平遙也志以為太平之西南二十

五里有九原山近是

昔陽

左傳昭公十二年晉荀吳偽會齊師者假道于鮮虞遂入昔陽秋八月壬午滅肥以肥子縣皋歸杜氏謂鮮虞

白狄別部在中山新市縣

今新樂縣

又謂鉅鹿下曲陽縣西

有肥累城

在今藁城縣西南七十里

是也其曰昔陽肥國都樂平沾

縣東有昔陽城則非也疏載劉炫之言以為齊在晉東偽會齊師當自晉而東行也假道鮮虞遂入昔陽則昔陽當在鮮虞之東也今按樂平沾縣在中山新市西南

五百餘里何當假道於東北之鮮虞而反入西南之昔陽也既入昔陽而別言滅肥則肥與昔陽不得為一安得以昔陽為肥國之都也昔陽既是肥都何以復言鉅鹿下曲陽有肥壘之城疑是肥名取於彼也肥為小國境必不遠豈肥名取鉅鹿之城建都於樂平之縣也十五年荀吳伐鮮虞圍鼓杜云鼓白狄之別鉅鹿下曲陽縣有鼓聚炫謂肥鼓竝在鉅鹿昔陽即是鼓都在鮮虞以東南也二十二年傳曰晉荀吳使師偽糴者負甲以

息于昔陽之門外遂襲鼓滅之則昔陽之為鼓都斷可

知矣

杜解昔陽故肥子所都果爾則其地已入晉何用偽糴以息其門外乎

漢書地理志

鉅鹿下曲陽應劭曰晉荀吳滅鼓今鼓聚昔陽亭是也

水經注泝水東逕肥累縣之故城南又東逕昔陽城南

本鼓聚十三州志曰今其城昔陽亭是矣京相璠曰白

狄之別也下曲陽有鼓聚其說皆同

水經注一卷中昔陽城兩見一在下

曲陽一在沾縣亦酈氏之誤也

史記趙世家惠文王十六年廉頗將攻

齊昔陽取之夫昔陽在鉅鹿故屬之齊豈得越太行而

有樂平乎

正義亦謬

晉之啟疆其用兵有次第宣公十五年滅潞氏十六年滅甲氏及留吁成公十一年伐廬咎如而上黨為晉有矣昭公元年敗無終及羣狄於大鹵而太原為晉有矣然後出師以臨山東昭公十二年滅肥二十二年滅鼓於是太行以南之地謂之南陽太行以東之地謂之東陽

水經注引馬季長曰晉地自朝歌以北至中山為東陽自朝歌以南至軹為南陽

而晉境東

接於齊蓋先後之勤且八十年而鮮虞猶不服焉

至魏文侯

始克
中山

太原

太原府在唐為北都唐書地理志曰晉陽宮在都之西北宮城周二千五百二十步崇四丈八尺都城左汾右

晉潛邱在中

爾雅晉有潛邱註在太原晉陽縣今已不存志曰相傳宋修惠明寺浮屠陶土為瓦

用長四千三百二十一步廣三千一百二十二步周萬

五千一百五十三步其崇四丈汾東曰東城貞觀十一年長史李勣築兩城之間有中城武后時築以合東城

宋史太宗紀
謂之連城

宮南有大明城故宮城也宮城東有起義

堂倉城中有受瑞壇當日規模之閎壯可見自齊神武
初建別都與鄴城東西竝立隋煬繼修宮室唐高祖因
以克關中有天下則天以後名為北都五代李氏石氏
劉氏三主皆興於此及劉繼元之降宋太宗以此地久
為創霸之府又宋主大火有參辰不兩盛之說於是一
舉而焚之矣宋史太宗紀太平興國四年五月戊子以
榆次縣為新并州乙未築新城丙申辛城北御沙河門

樓盡徙餘民於新城遣使督之既出即命縱火丁酉以
行宮為平晉寺陸游老學庵筆記曰大宋太平興國四
年平太原降為并州廢舊城徙州於榆次今太原則又
非榆次乃三交城也城在舊城東北三十里亦形勝之
地本名故軍又嘗為唐明鎮有晉文公廟甚盛平太原
後三年帥潘美奏乞以為并州從之於是徙晉文公廟
以廟之故址為州治又徙陽曲縣於三交而榆次復為
縣然則今之太原府乃三交城而太原縣不過唐都城

之一隅耳其遺文舊蹟一切不可得而見矣

舊唐書崔神慶傳曰則天時擢拜并州長史先是并州

有東西二城隔汾水

唐張南史送鄭錄事詩六月燕山冷雙城汾水流

神慶始

築城相接每歲省防禦兵數千人邊州甚以為便此即

志所云兩城之間有中城者也

僖宗乾符六年河東軍亂焚掠三城以朱玫為

三城斬斫使

汾水湍悍古人何以架橋立城如此之易如長

安東中西三渭橋昔為方軌而今則咸陽縣每至冬月

乃設一版河陽驛杜預所立浮橋其遺跡亦復泯然

魏書

崔亮傳除安西將軍雍州刺史城北渭水淺不通船行人艱阻亮謂寮佐曰昔杜預乃造河梁況此有異長河且魏晉之日亦自有橋吾今決欲營之咸曰水淺不可為浮橋汎漲無恒又不可施柱恐難成立亮曰昔秦居咸陽橫橋渡渭以象閣道此即以柱為橋今惟慮長柱不可得耳會天大雨山水暴至浮出長木數百根藉此為用橋遂成立百姓利之至今猶名崔公橋北史于栗碑傳為豫州刺史明元帝幸盟津謂栗碑曰河可橋乎栗碑曰杜預造橋遺事可想乃編大蒲津鐵牛求一船構橋於野坂六軍既濟帝深歎美之蒲津鐵牛求一僧懷丙其人不可得宋史方技傳國有六職百工與居一焉不但五者不如古人而已

代

春秋時代尚未通中國趙襄子乃言從常山上臨代代可取也正義曰地道記云恒山在上曲陽縣西北一百四十里北行四百五十里得恒山岓號飛狐口北則代郡也水經注引梅福上事曰代谷者恒山在其南北塞在其北谷中之地上谷在東代郡在西此則今之蔚州乃古代國項羽徙趙王歇為代王歇更立陳餘為代王漢高帝立兄劉仲為代王皆此地也

金蔚州東二十里相傳有代王城

十年陳豨反十一年破豨立子恒為代王都晉陽

高祖紀

則今之太原縣矣孝文紀則云都中都陳稀傳同而文帝過

太原復晉陽中都二歲

如淳以為先都晉陽後遷中都

又立子武為代

王都中都則今之平遙縣矣

正義引括地志中都故城在汾州平遙縣西南十二

里

又按衛綰代大陵人大陵今在文水縣北而屬代代都

中都故也代凡三遷而皆非今代州今代州之名自隋

始

闕里

水經注孔廟東南五百步有雙石闕故名闕里按春秋

定公二年夏五月壬辰雉門及兩觀災冬十月新作雉門及兩觀註雉門公宮之南門兩觀闕也禮記昔者仲尼與於蜡賓事畢出游於觀之上史記魯世家煬公築茅闕門蓋闕門之下其里即名闕里而夫子之宅在焉亦謂之闕黨魯論有闕黨童子荀子仲尼居於闕黨是也後人有以居為氏者漢書儒林傳有鄒人闕門慶忌註云姓闕門名慶忌

後漢書獻帝紀下邳賊闕宣註闕黨童子之後識文言代漢者當

塗高當塗而高者闕也故闕宣自稱天子

杏壇

今夫子廟庭中有壇石刻曰杏壇闕里志杏壇在殿前
夫子舊居非也杏壇之名出自莊子莊子曰孔子遊乎
緇帷之林休坐乎杏壇之上弟子讀書孔子弦歌鼓琴
奏曲未半有漁父者下船而來須眉交白被髮揄袂行
原以上距陸而止左手據膝右手持頤以聽曲終又曰
孔子乃下求之至於澤畔方將杖屨而引其船顧見孔
子還鄉而立孔子反走再拜而進又曰客乃刺船而去

延緣葦間顏淵還車子路授綏孔子不顧待水波定不聞挈音而後敢乘司馬彪云緇帷黑林名也杏壇澤中高處也莊子書凡述孔子皆是寓言漁父不必有其人杏壇不必有其地即有之亦在水上葦間依陂旁渚之地不在魯國之中也明矣今之杏壇乃宋乾興間四十五代孫道輔增修祖廟移大殿於後因以講堂舊基甃石為壇環植以杏取杏壇之名名之耳

徐州

史記齊太公世家田常執簡公于徐州田敬仲完世家
宣王九年與魏襄王會徐州諸侯相王也十年楚圍我
徐州魏世家襄王元年與諸侯會徐州楚世家威王七
年齊孟嘗君父田嬰欺楚楚伐齊敗之於徐州越世家
句踐已平吳乃以兵北渡淮與齊晉諸侯會於徐州魯
世家頃公十九年楚伐我取徐州

索隱曰徐音舒徐州
齊邑薛縣是也非九

州之

按後漢書志薛本國六國時曰徐州在今滕縣之

南薛河北有大城田文所築也此與楚魏二國為境而

威王曰吾吏有黔夫者使守徐州則燕人祭北門趙人祭西門徙而從者七千餘家蓋與梁惠王言不欲斥魏更以燕趙夸之耳

索隱曰說文邾邾之下邑在魯東又竹書紀年云梁惠成王三十一年邾遷于薛改名曰徐州則徐與邾竝音舒也今讀為禹貢徐州之徐者誤齊世家田常執簡公于徐州春秋正作舒州

向

春秋隱二年莒人入向杜氏解曰譙國龍亢縣東南有
向城桓十六年城向無解宣四年公及齊侯平莒及郟
莒人不肯公伐莒取向解曰向莒邑東海永縣東南有
向城遠疑也襄二十年仲孫速會莒人盟于向解曰莒
邑按春秋向之名四見於經而杜氏註為二地然其實
一向也先為國後并於莒而或屬莒或屬魯則以攝乎
大國之間耳永縣今在嶧杜氏以其遠而疑之况龍亢
在今鳳陽之懷遠乎

水經注於軹縣向城下引
向姜不安於莒而歸尤誤

齊乘以

為今沂州之向城鎮

州西南一百里

近之矣

小穀

春秋莊三十二年城小穀左氏傳曰為管仲也蓋見昭公十一年申無宇之言曰齊桓公城穀而寘管仲焉至於今賴之而又見僖二年經書城楚邱之出於諸侯謂仲父得君之專亦可勤諸侯以自封也是不然仲所居者穀也此所城者小穀也春秋有言穀不言小者莊二十三年公及齊侯遇于穀僖二十六年公以楚師伐齊

取穀文十七年公及齊侯盟于穀成三年叔孫僑如會
晉荀首于穀四書穀而一書小穀別於穀也范甯曰小
穀魯地然則城小穀者內城也故不繫之齊而與管仲
無與也漢高帝以魯公禮葬項羽于穀城即此魯之小
穀而註引皇覽以為東郡之穀城與留侯所葆之黃石
同其地其不然明矣春秋發微曰曲阜西北有小穀城
泰山立石

嶽頂無字碑世傳為秦始皇立按秦碑在玉女池上李

斯篆書高不過五尺而銘文并二世詔書咸具不當又立此大碑也考之宋以前亦無此說因取史記反覆讀之知為漢武帝所立也史記秦始皇本紀云上泰山立石封祠祀其下云刻所立石是秦石有文字之證今李斯碑是也封禪書云東上泰山泰山之草木葉未生乃令人上石立之泰山巔上遂東巡海上四月還至奉高上泰山封而不言刻石是漢石無文字之證今碑是也後漢書祭祀志亦云上東上泰山乃上石立之泰山巔然

則此無字碑明為漢武帝所立而後之不讀史者誤以
為秦耳

始皇刻石之處凡六史記書之甚明於鄒嶧山則上云
立石下云刻石頌秦德於泰山則上云立石下云刻所
立石於之罘則二十八年云立石二十九年云刻石於
瑯邪則云立石刻頌秦德於會稽則云立石刻頌秦德
無不先言立後言刻者惟於碣石則云刻碣石門門自
是石不須立也古人作史文字之密如此使秦皇別立

此石秦史焉得不紀使漢武有文刻石漢史又安敢不錄乎

泰山都尉

後漢書桓帝紀永興二年泰山琅邪賊公孫舉等反殺長史永壽元年七月初置泰山琅邪都尉官延熹五年八月己卯罷琅邪都尉官八年五月壬申罷泰山都尉官金石錄載漢泰山都尉孔宙碑云宙以延熹四年卒蓋卒後四年官遂廢矣然泰山都尉實不始於此光武

時曾置之文苑傳夏恭光武時拜郎中再遷泰山都尉
又按光武紀建武六年初罷郡國都尉官恭之遷蓋在
此年前也

泰山自公孫舉東郭竇勞丙叔孫無忌相繼叛亂以是
置都尉之官以後官雖不設而郡兵領於太守其力素
厚故何進使府掾泰山王匡東發其郡強弩而應劭夏
侯淵亦以之破黃巾可見漢代不廢郡兵之效而建安
中曹公表曰泰山郡界曠遠舊多輕悍權時之宜可分

五縣為羸郡則其時之習俗又可知矣

濟南都尉

漢濟南郡太守治東平陵而都尉治於陵者以長白山

也

今龍山驛東有東平陵城後漢書侯霸傳註於陵故城在今淄川長山縣南

魏書辛子馥

傳長白山連接三齊瑕邱數州之界多有盜賊子馥受

使檢覆因辨山谷要害宜立鎮戍之所又諸州豪右在

山鼓鑄姦黨多依之又得密造兵仗亦請破罷諸冶朝

廷善而從之隋大業九年齊人孟讓王薄等衆十餘萬

據長白山攻剽諸郡以張須陀王世充之力不能滅訖于隋亡觀此二事則知漢人立都尉治於陵之意矣

鄒平臺二縣

漢書濟南郡之縣十四一曰東平陵二曰鄒平三曰臺四曰梁鄒功臣表則有臺定侯戴野梁鄒孝侯武虎是二縣竝為侯國後漢書濟南郡十城其一曰東平陵其四曰臺其七曰梁鄒其八曰鄒平而安帝紀云延光三年二月戊子濟南上言鳳凰集臺縣丞霍收舍樹上章

懷太子註云臺縣屬濟南郡故城在今齊州平陵縣北
晏子春秋景公為晏子封邑使田無宇致臺與無鹽水
經注亦云濟水又東北過臺縣北尋其上下文句本自
了然後人讀漢書誤從鄒字絕句因以鄒為一縣平臺
為一縣齊乘遂謂漢濟南郡有鄒縣後漢改為鄒平又
以臺平臺為二縣此不得其句讀而妄為之說也

漢以鄒名縣者五魯國有騶亦作鄒膠東國有鄒盧千
乘郡有東鄒與濟南之鄒平梁鄒凡五其單稱鄒者今

兗州府之鄒縣也亦有平臺屬常山郡外戚恩澤侯表
平臺康侯史玄後漢書邳彤傳尹綏封平臺侯是也有
鄒平有臺而亦有鄒有平臺不可不辨也

晉時縣名多沿漢舊按史何曾傳曾孫機為鄒平令是
有鄒平矣解系傳父修封梁鄒侯劉頌傳追封梁鄒縣
侯是有梁鄒矣宋書言晉太康六年三月戊辰樂安梁
鄒等八縣隕霜傷桑麥文帝紀元嘉二十八年五月乙
酉亡命司馬順則自號齊王據梁鄒城八月癸亥梁鄒

平斬司馬順則是宋有梁鄒矣不知何故晉書地理志於樂安國下單書一鄒字此史之闕文而齊乘乃云晉省梁鄒入鄒縣夫晉以前此地本無鄒縣而何從入之乎蓋不知而妄作者矣

夾谷

春秋定公十年夏公會齊侯于夾谷傳曰公會齊侯于祝其實夾谷杜預解及服虔註史記皆云在東海祝其縣劉昭志杜佑通典因之遂謂夾谷山在今贛榆縣西

五十里按贛榆在春秋為莒地與齊魯之都相去各五六百里何必若此之遠當時景公之觀不過曰遵海而南放於琅邪而已未聞越他國之境金史云淄川有夾谷山一統志云夾谷山在淄川縣西南三十里舊名祝其山其陽即齊魯會盟之處萌山發源於此水經注萌水出般陽縣西南甲山是以甲山為夾谷也而萊蕪縣志則又云夾谷在縣南三十里接新泰界未知其何所據然齊魯之境正在萊蕪東至淄川則已入齊地百餘

里二說俱通又按水經注萊蕪縣曰城在萊蕪谷當路
岨絕兩山間道由南北門舊說云齊靈公滅萊萊民播
流此谷邑落荒蕪故曰萊蕪禹貢所謂萊夷也夾谷之
會齊侯使萊人以兵劫魯侯宣尼稱夷不亂華是也是
則會於此地故得有萊人非召之東萊千里之外也
遷此已久號其
故國為東萊不可泥祝其之名而遠求之海上矣

濰水

濰水出琅邪郡箕屋山

今在莒州西
北九十里

書禹貢濰淄其道

左傳襄公十八年晉師東侵及濊是也其字或省水作
維或省系作淮又或从心作惟總是一字漢書地理志
琅邪郡朱虛下箕下作維靈門下橫下折泉下作淮上

文引禹貢惟留其道又作惟一卷之中異文三見

馬文煒曰

漢書王子侯表城陽頃王子東淮侯類封北海按北海郡別無淮水蓋亦濊字之異文

通鑑梁武

帝紀魏李叔仁擊邢杲于惟水

胡三省註惟當作濊

古人之文或

省或借其旁竝从鳥佳之佳則一爾後人誤讀為淮沂

其人之淮而呼此水為槐河失之矣

按淮字當从佳人之佳乃得聲今本

說文
亦誤

又如三國志吳主傳作棠邑涂塘以淹北道晉書宣帝紀王凌詐言吳人塞涂水武帝紀琅邪王伉出涂中海西公紀桓溫自山陽及會稽王昱會于涂中孝武紀遣征虜將軍謝石帥舟師屯涂中安帝紀譙王尚之衆潰逃于涂中竝是滁字南史程文季傳秦郡前江浦通涂水是也古滁省作涂與維省作淮正同韻書竝不收此二字

勞山

勞山之名齊乘以為登之者勞又云一作牢丘長春又改為鰲皆鄙淺可笑按南史明僧紹隱于長廣郡之嶠山本草天麻生太山嶠山諸山則字本作嶠若魏書地形志唐書姜撫傳宋史甄棲真傳竝作牢乃傳寫之誤魏書高祖紀釋老志竝仍作勞山

詩山川悠遠維其勞矣箋云勞勞廣闊則此山或取其廣闊而名之鄭康成齊人勞勞齊語也

山海經西山經亦有勞山與此同名

寰宇記秦始皇登勞盛山望蓬萊後人因謂此山一名勞盛山誤也勞盛二山名勞即勞山盛即成山史記封禪書七曰日主祠成山斗入海漢書作盛山古字通用齊之東偏環以大海海岸之山莫大於勞成二山故始皇登之史記秦始皇紀令入海者齎捕巨魚具而自以連弩候大魚至射之自琅邪北至榮成山弗見至之罘見巨魚射殺一魚正義曰榮成山即成山也按史

書及前代地理書並無榮成山予向疑之以為其文在琅邪之下成山之上必勞字之誤後見王充論衡引此正作勞成山乃知昔人傳寫之誤唐時諸君亦未之詳考也遂使勞山併盛之名成山冒榮之號今特著之以正史書二千年之誤

楚丘

春秋隱公七年戎伐凡伯于楚丘以歸杜氏曰楚丘衛地在濟陰成武縣西南夫濟陰之成武此曹地也而言

衛非也蓋為僖公二年城楚丘同名而誤按衛國之封

本在汲郡朝歌

隱公元年解云衛國在汲郡朝歌縣今衛輝府淇縣

懿公為狄

所滅渡河而東立戴公以廬于曹杜氏曰曹衛下邑詩

所謂思須與漕廬者無城郭之稱而非曹國之曹也僖

公二年城楚丘杜氏曰楚丘衛邑詩所謂作于楚宮而

非戎伐凡伯之楚丘也但曰衛邑而不詳其地然必在

今滑縣開州之間滑在河東故唐人有魏滑分河之錄

矣水經注乃曰楚丘在成武西南即衛文公所徙誤矣

彼曹國之地齊桓安得取之而封衛乎以曹名同楚丘之名又同遂附為一地爾

今曹縣東南四十里有景山疑即商頌所云陟彼景山松柏丸丸而左傳昭公四年椒舉言商湯有景亳之命者也

詩正義引皇甫謐曰蒙為北亳即景亳是湯所受命也

鄘詩望楚與堂景山

與京則不在此也

東昏

漢陳留郡有東昏後漢志註云陳留志曰故戶牖鄉有

陳平祠而山陽郡有東緡後漢志春秋時曰緡註云左
傳僖公二十三年齊侯伐宋圍緡前書師古曰緡音旻
左傳解緡宋邑高平昌邑縣東南有東緡城史記絳侯
周勃世家攻爰戚東緡以往索隱曰山陽有東緡縣屬
陳留者音昏屬山陽者音旻括地志云東緡故城在允
州金鄉縣界水經注引王誨碑辭曰使河隄謁者山陽
東昏司馬登是以緡為昏誤矣隸釋酸棗令劉熊碑陰
故守東昏長蘇勝則陳留之東昏也

通鑑註李愬攻金鄉引東緡者故陽

武戶牖
鄉亦誤

長城

春秋之世田有封洫故隨地可以設關而阡陌之間一縱一橫亦非戎車之利也觀國佐之對晉人則可知矣至於戰國井田始廢而車變為騎於是寇鈔易而防守難不得已而有長城之築史記蘇代傳燕王曰齊有長城鉅防足以為塞竹書紀年梁惠成王二十年齊閔王築防以為長城後漢志濟北國盧

今長清縣

有長城至東海

泰山記泰山西有長城綠河徑泰山一千餘里至琅邪

臺入海此齊之長城也史記秦本紀魏築長城自鄭

今華

州濱洛以北有上郡蘇秦傳說魏襄王曰西有長城之

界竹書紀年惠成王十二年龍賈帥師築長城于西邊

此魏之長城也後漢志河南郡卷

絳侯世家正義引括地志云故卷城在鄭

州原武縣西北七里釋例地名云卷縣所理垣雍城也

有長城經陽武到密此韓

之長城也水經注盛弘之云葉東界有故城始犍縣東

至觀水達沘陽南北數百里號為方城一謂之長城郡

國志曰葉縣有長城曰方城

又越世家正義引括地志云故長城在鄧州內鄉縣

東七十五里南入穰縣北連翼望山無土之處累石為固楚襄王作霸南土爭強中國多築列城於北方以通

華夏號此楚之長城也若趙世家成侯六年中山築長

城又言肅侯十七年築長城

劉伯莊云從雲中以北至代非也武靈王時始有雲

中正義曰此長城疑在潼水之北趙南界則趙與中山亦有長城矣以此言

之中國多有長城不但北邊也

其在北邊者史記匈奴傳秦宣太后起兵伐殘義渠於是秦有隴西北地上郡築長城以備邊此秦之長城也

魏世家惠王十九年築長城塞固陽

正義曰括地志云
桐陽縣漢舊縣也

在銀州銀城縣界桐陽有連山
東至黃河西南至夏會等州

此魏之長城也匈奴傳

又言趙武靈王北破林胡樓煩築長城

正義曰括地志
云趙武靈王長

城在朔州善陽縣北按水經云百道長城北山上有長
垣若頽毀焉汾溪巨嶺東西無極蓋趙武靈王所築也

自代竝陰山

索隱曰徐廣云西安陽縣北有陰山陰山
在河南陽山北也正義曰括地志云陰

山在朔州絕
塞外突厥界

下至高闕為塞

徐廣曰在朔方正義曰
地理志云朔方臨戎縣北

有連山險於長城其山中斷
兩峯俱峻俗名為高闕也

而置雲中鴈門代郡此趙

之長城也燕將秦開襲破東胡東胡却千餘里燕亦築

長城自造陽

韋昭曰地名在上谷義曰按上谷郡今媯州

正

至襄平

索隱曰韋昭云

今遼東所理也

置上谷漁陽右北平遼西遼東郡以備邊此燕

之長城也秦滅六國而始皇帝使蒙恬將十萬之衆以

北伐悉收河南地因河為塞

索隱曰按太康地記秦塞自五原北九里謂之造陽

東行終利貢山南漢陽西是也

築四十四縣城臨河徙適戍以充之而

通直道

索隱曰蘇林云去長安千里正南北相直道也

自九原至雲陽

索隱曰韋昭云

九原縣屬五原

正義曰括地志云勝州連谷縣本秦

九原郡漢武帝更名五原云陽雍縣秦之林光宮即漢

之甘泉宮在焉又云秦故道在慶州華池縣西四十五里子午山上自九原至雲陽千八百里

因邊山

險塹谿谷可繕者治之起臨洮至遼東萬餘里

索隱曰韋昭曰

臨洮隴西縣

正義曰括地志云秦隴西郡臨洮縣即

今岷州城本秦長城首起岷州西十二里延袤萬餘里

東入遼水又度河據陽山北假中

北假北方田官主以田假與貧人故云北假索隱

曰應劭云北假在北地陽山北韋昭云北假地名正

義曰括地志云漢五原郡河目縣故城在北假中北假

在河北今屬勝州銀成縣漢書

王莽傳云五原北假膏壤殖穀此秦并天下之後所築

之長城也自此以後則漢武帝元朔二年遣將軍衛青

等擊匈奴取河南地築朔方復繕故秦時蒙恬所為塞

因河為固魏明元帝泰常八年二月戊辰築長城於長

川之南起自赤城西至五原延袤二千餘里太武帝太平真君七年五月丙戌發司幽定冀四州十萬人築城

北史作畿

上塞圍起上谷西至河廣袤皆千里北齊文宣帝

天保三年十月乙未起長城自黃櫨嶺北至社干戌四百餘里立三十六戌

通鑑註此長城蓋起於唐石州北抵武州之境

六年發民


一百八十萬築長城自幽州北夏口至恒州九百餘里

通鑑註幽州夏口即居庸下口也幽州軍都縣西北有居庸關先是自西河總秦戌築

長城東至於海前後所築東西凡三十餘里率十里一

戍其要害置州鎮凡二十五所八年於長城內築重城
自庫洛拔而東至於塢紇戍凡四百餘里而斛律羨傳
云羨以北兵屢犯邊須備不虞自庫堆戍東距於海隨
山屈曲二千餘里其間二百里中凡有險要或斬山築
城或斷谷起障并置立戍邏五十餘所周宣帝大象元
年六月發山東諸州民修長城立亭障西自鴈門東至
碣石隋文帝開皇元年四月發稽胡修築長城五年使
司農少卿崔仲方發丁三萬於朔方靈武築長城東距

黃河西至綏州南至勃出嶺綿歷七百里六年二月丁亥復令崔仲方發丁十五萬於朔方以東緣邊險要築數十城七年發丁男十萬餘人修長城大業三年七月發丁男百餘萬築長城西踰榆林東至紫河四年七月辛巳發丁男二十餘萬築長城自榆林谷而東此又後史所載繼築長城之事也



日知錄卷三十一